

# *TUKISA LISELI*

 Ku lukile. Kana ye ki...[Muzwale uli, “Ye kona maikulofoni ya hao.”—Mu.] Ye kona ye utwahalela kaufela? Ni itumezi, sha. [“Ye kona maikulofoni ye tukile.”] Eeni, sha. Ku lukile. Ni bona kuli ne li sweli ku utwahalisa lilata kwa mulaho kwani, mi kacwalo...Ki kakusasana, balikani. Kana mwa ni utwa hande kafo kwa mulaho? [Puteho ili, “Eeni.”] Sani si li timile. Ni itumezi.

<sup>2</sup> Na luli ni mutu ya litohonolo, kakusasana cwana, ka kutaha kwanu kwa katala, kasamulaho wa bupaki bo bu ishuwile bo bu filwe; ka kulika ku—ku tomahanya hanyinyani fela ku se ba bulezi, kutisa limbuyoti ku luna sina ha lu ikozi kakusasana cwana. Cwale, Ni lemuhile kuli babañwi ba bona neli hahulu...

<sup>3</sup> [Mihala ya silimba ya PA ieza lilata. Muzwale uli, “Ni sepa kuli lu ka lukela ku ibeya sinca, wo, mwahali, Muzwale Branham.”—Mu.] Ku lukile, sha. Kana kwa utwahala hande?

<sup>4</sup> Ni baana babañwi mo, mo ba bulelezi, mane buñata bwa bona...Kihande, mañi ni mañi kwanu nana ni bupaki bobunde luli, bo bu na ni mata. Mo Ni itumela ka seo, bupaki bobunde bwani ku Mulena!

Cwale lu ka atumela Linzwi.

<sup>5</sup> Mi Na, sunda ye, Ni lelide mwa pilu yaka isiñi ku buluka sicaba lihola zepeli ze kamba zetalu, ze tomilwe, ku ni teezeza. Na mi bulelela libaka le Ni—Ni ezeza cwalo, balikani. Ha ni si ka ituta, mi Ni kona fela kubulela ka susumezo. Cwale, mutu yana ni tuto, ha susumelizwe, ni yena; kono yena wakona kutatulula za sweli kubulela, ka tuto ya hae, kutisa manzwi a ka lumeleza sicaba kuziba sa sweli kubulela. Kusina tuto, Ni lukela kunga lisupo za pupo ni kutatulula ka susumezo ye Ni nani. Mi seo sitisa tata luli, fokuñwi, kuli sicaba si utwisise hande. Lu fumana kuli Ne ni katazehile luli ka zona kufitela Ni fumana mwa Bibebe kuli Mulimu na ezize ka mukwa o swana, ka linzila ze swana.

<sup>6</sup> Lwa lemuha, sina Joani Mukolobezi, haluna pipo ni yekana yepaka za tuto ya hae, mi cwale, ha na—ha na zwile mwa lihalaupa, akala kubulela kwa—kwa...kopano ya hae, keleke ya lizazi lani. Mi lu lemuha mwa na li taluseza. Ki hali, “Mina bana ba linoha.” Mwabona, sani kona sa na twaezi, ze bupilwe ni lihalaupa; manzwi amañwi, ki sika se si telela ni se si lembutuka, ni kupuma. Cwale, mutu yomuñwi hakulata u konile kutisa manzwi cwalo yana ka bulela kuli “baikankabeki” kamba linzwi leliñwi la na ka itusisa. Kono Joani aitusisa linzwi la kuli “noha.” Ni sepa kuli mañi ni mañi na utwisisa sa na bulela.

<sup>7</sup> Kacwalo he ali, “Musike mwa kala kunahana mwahala mina, kuli, ‘lu ba siemba *se* mi lu ba siemba *sani*,’ kakuli Ni mi bulelela

kuli, Mulimu wakona ka ona macwe aa fa,” mwabona, mwabona, isiñi zeñwi zetuna. “Mulimu wa kona kuzusa kwa macwe aa.” Na a bonahalize mwa pupo.

<sup>8</sup> Mi, hape, “Silepe si yendekilwe kwa mubisi wa kota.” Muzwale yomuñwi yomunde ya itutile, ka yona susumezo yeswana yani, hakulata na bulezi kuli, “Uka sinyeleza ku felelela.” Ki hali, “Silepe si yendekilwe kwa mubisi wa kota.” Sani sa i yundisa, nihakuli cwalo, mwabona, kacwalo a—a ziba kuli neli cwalo. Nana ni fela likalulo zani, kakuli mwendi na sina sikolo ni hanyinyani.

Ha lu inamiseñi litoho za luna fa nako nyana.

<sup>9</sup> Ni na ni likupo mo za tapelo. Zeo, bo kona bulumiwa bwaka, ze ni lapelela bakuli. Nina ni likupo zeñwi fa, likupo zeñwi ze ipitezi luli. Mi Ni ziba kuli kuna ni zeñata mwahali mo. Mi haiba kuna ni babañwi, kakusasana cwana, baba tabela ku hupulwa? Kihande, haiba mu ka nanula fela mazoho a mina ku Mulimu, muli, “Ni . . .” Cwale amu swale fela likupo za mina halunze lu lapela.

<sup>10</sup> Ndata luna yakwa Lihalimu, lu atumela cwale Kukena kwa Hao, ka Libizo la Mwana Hao ya Kenile, yena Mulena Jesu, ku kupa kupo yeñwi ye, ya sicaba kaufela se si ñozi likupo za sona, ze Ni nani sona mwa lizoho laka mo. Sihulu mwana mushimani wa muzwale yo, mwana musizana yomunde ya pazuzwi mwa kozi ya fa mukwakwa. Ni lapelela mwana yani, Mulena. Mi Ni lapelela likupo zeñwi kaufela. Mi bona babali kwa mukunda ku luna cwale, konji fela ku alimuñwi ya nanuzi lizoho la hae; kono ki Wena Mulimu ya sa palelwi, mi U ziba mulelo kaufela ni likupo za luna kaufela. Lu lapela kuli U alabe. Kakuli U sepe size cwalo, lwa lumela cwalo.

<sup>11</sup> Mi lu kupa cwale kuli U nge manzwi alikani o luka bala aa, ni ku a susumeza ku luna, Mulena, halunze lu libelela ku Wena. Mi Moya o Kenile usutelele bukaufi ni mutu ni mutu, mi u lu patululele toloko ya Linzwi. Kakuli lu kupa ka Libizo la Jesu. Amen.

<sup>12</sup> [Muzwale uli, “Muzwale Branham, kana lwakona ku tatuba ni kubona haiba ika beleka?”—Mu.] Eeni, sha, muzwale, i katuluse fela. Zeo li lukile. Ha Ni nze ni apula cwale, Nina ni . . .

<sup>13</sup> Ne ni hupulanganga Mañolo aka ni lika zeñwi, kusina kuba ni—ni kapepa, kono kuzwa fo Ni fitelezi mashumi amabeli ka aketalizoho, zeo ha li beleki hande luli. Ni lukela kuhupula ka ku liñola. Cwale lu ka . . .

<sup>14</sup> Kana ku cwalo? Kana mwa utwa hande foo? Batili. Kwa mulaho, ba sweli kunyunga litoho zabona. Mwendi. . . [Muzwale uli, “U lukela kuyema kwapata a zeo.”—Mu.] Una ni kuyema. . . [“Kwapata.”] Kulukile. Mi cwale ze likona kuba cwani sina cwana, kana mwa utwa sani? Ku cwani ka sani, ki hande? Kulukile. Sani ki sesinde.

<sup>15</sup> Cwale Ni bata ku bizeza kutwisiso ya mina ku—ku Isaya 42:1-7, mi hape ni mwa Mateu 4:15-16.

*Amubone mutanga ka, ye Ni tiisa; muketiwa wa ka, yo katelwa moyo wa ka; Ni beile moyo wa ka fahalimu a hae: u ka tiseza Macaba zamaiso ya ku luka.*

*Ha na huwa, ha na kutumusa kwa linzwi, ni ku li utwahalisa mwa patelo.*

*Ha na kulobeleta litaka le li fonyokile, . . . mi ha na kutima lumonyi lo lu sa tunyisa musi: u ka zamaisa ka ku luka mwa niti.*

*Ha na ku fokola kamba kuzwafa, kufitela atomile zamaiso ya ku luka mwa lifasi: lioli li ka sepa mulao wa hae.*

*Sa bulela . . . MULENA, yena ya ezize lihalimu, ni ku li namulula; ya patamisize lifasi, ni se si mela ku lona; yena ya file lico baba yahile kulona kubuyela, a fa baba zamaya ku lona moyo*

*Na MULENA ni ku bizelize za kuluka, ni ka kuswala kwa lizoho, . . . ni ku babalele, mi ni kubeye kuswalisa bulikani ni sicaba, ni kuba liseli la Bamacaba;*

*Ku tutubula . . . meto a libofu, ku zwisa . . . ba ba tamilwe mwa tolongo, ni baba inzi mwa lififi la . . . tolongo ya musima.*

<sup>16</sup> Mi cwale ku Muñoli Mateu 4, kukalela fa timana ya 12, lu bala cwana.

*Cwale Jesu ha utwile kuli Joani u kenyizwe mwa tolongo, akutela kwa Galilea;*

*. . . atuta kwa Nazareta, ataha ku to pila mwa Kapernauma, ili munzi o fa likamba la liwate, wa miluwani ya Zabuloni ni Nefetali:*

*Kuli ku ezahale se ne si bulezwi ki mupolofita Isaya, hali,*

*Naha ya Zabuloni, ni naha ya Nefetali, ye bapani ni liwate, mwa buse bwa Jordani, Galilea ya Bamacaba;*

*Sicaba se ne si inzi mwa lififi si boni liseli lelituna; mi ba ba ne bainzi mwa naha ya lifu ni mwa muluti wa lona ba pazulezwi ki liseli.*

*Ku zwa fo Jesu a kala ku luta batu, . . . ali, Mu bake: kakuli mubuso wa kwa lihalimu u sutelezi fakaufi.*

<sup>17</sup> Mulena afuyole Linzwi la Hae! Cwale tuto yaka kakusasana cwana kikuli: *Tukisa Liseli*. Mi kapili fela mo Ni konela, kuli mukone kuzwa mwa tumelelano yetatama ye cwale, yekaba mwendi mwa mizuzu ye mashumi amane ka yeketalizoho.

<sup>18</sup> Mwa ziba, Bo. Mc Anally, Na sepa u teni. Ni boni mota ya hae fande. Nako yeñwi yefitile, nelu inzi, iliñwi ya misipili yaka ya pili kwa Arizona, kuyo zuma. Ne luinzi kwanu bukaufi ni Superstition Mountain. Ne ni utwile ka zona fa nako yetelele, mi na utwa buñata bwa baika be ne ba bulezi ka za Superstition. Na hupula ha ne ni ibata, nako yapili; neli zazi la maloba, mi muluti omutuna oswana sina wa sipuku wa nyendaela kwa neku la upa laka, ko ne ku zibahala kuli ki kwa Superstition. Ne ni utwile ka za ma Indian, mo ne ba sa zamaelei bukaufi ni lona, mo ne ba saba, mo ne ba nyandiselize ma Spanish mwa mazazi apili hane basweli kubata gauda. Ne ba bulela kuli mioya yemaswe kona mo ne ipila. Zeo kaufela za ni tiseleza kuba kuli ni batise. Kono Ni bile fela ni liseli le li monyeha, kuli ni bone Superstition, pili.

<sup>19</sup> Mi cwale Na talima kufitela, kasamulaho nyana, bulena bwa lizazi bwa kala ku zamaya fahalimwa lififi. Mi hane kubile cwalo, la kauhanya lififi kwa liseli, ni ku nyunga lififi kwateni. Mafelelezo, la hulela kwa butuna bwa hae, fahalimwa lilundu, mi za bonisa Superstition fela mo ne liinezi. La monyeha ni kubonisa kuli neli nto mañi. Mi lipuku kaufela ni ze sabisa zene Ni bile ni zona ka za Superstition, fani lizazi hane li monyeha mwa mata a lona fahalimwa lona, ne li sabile maswe.

<sup>20</sup> Lizazi ki mulena wa maseli kaufela fa lifasi le, mwa maseli a butu. Hakuna taba ka liseli la buhata le lu kaba ni lona, ni maseli amatuna cwani a magesi elukona kubonahalisa; lizazi lani ha li pazula, zeñwi zani kaufela za tima.

<sup>21</sup> Yani kona taba yeswana yeli ni Linzwi la Mulimu. Mi Linzwi la Mulimu ha li taha, ku kakanya kaufela, bufitelezi bwa likopano kaufela ni lika zeñwi, za hasana, mi li bonisa fela ona cwalo mo liinezi. Mulimu, kwa simuluhu, naize, “Ha ku be liseli.” Liseli li tahanga fela, ili Liseli la niti, ili Liseli la mulena, litaha ka Linzwi la Mulimu. Mulimu na kauhanyize liseli kwa lififi, kwa simuluhu. Mi Linzwi la Mulimu, le li bonahalile, kamita la kauhanyanga Liseli kwa lififi.

<sup>22</sup> Batu bakona kutaha ni se, *sani*, kamba sesiñwi; tukutwana twa kona kutaha, Swalisano, Fascism, ni milao yeñwi kaufela yekona kutaha; za kuinahanelo, milapelo ya mioya, kamba ikona kuba sikamañi kaufela, zakona kutaha. Kono cwale Liseli la mulena lani la Bibebe ha li nanuha, ku kakanya kaufela ni lika zeñwi... Kono, mwa bona, lu ziba kuli liteni, kono kufitela Li pakiwa, libonisa Liseli la Lona; kona kuli haluna tukelo ya ku kanana ni Sani, kakuli si kwalela liseli leliñwi kaufela kwande. Jesu naize, “Linzwi la mutu kaufela alibe la buhata, mi la Ka libe la Niti.” Linzwi la Hae li fahalimwa manzwi a mutu kaufela, fahalimwa lika kaufela, sika kaufela. Linzwi la Hae ki Liseli.

<sup>23</sup> Mi lu ziba kuli kwa simuluhu neku lukela kuba mbundu ni puka ni bunsu, sina lifasi hane li pikuluha, mi cwale Mulimu ha na zibi kuli Na tokwa liseli. Cwale, peu ya Hae neili kale

mwa mubu, kakuli Na i cezi kale mwateni. Cwale Na tokwa liseli kuli atahise peu yani, kuli peu yani ipile, kakuli peu neili kale mwateni.

<sup>24</sup> Inge fela mo kuinezi mwa lusika lufi ni lufi, Mulimu u lu bulelezi kale se si ka ezahala mwa lusika lufi ni lufi. Taba fela inosi Ya tokwa ki ponahazo ya Liseli la Mulimu fahalimwa Liñolo lani, kuli li kone kupila mwa lusika lwani. Fela . . . ? . . . Mi li ka ezahala haibile fela Liseli likona kufita kwa Linzwi. Haiba Linzwi la kona kumela, Li ka pila haiba ki sepiso ya lizazi lani.

<sup>25</sup> Mwakona kucala buloto ka nako yeñwi, kamba bubeke ka nako isili. Babañwi ba tahanga ka bunya kufita babañwi, kakuli kuitingile ka mwaha wateni.

<sup>26</sup> Linzwi la Mulimu litahanga mwa mwaha wateni, mulao ni muhau, ni zeñwi cwalo, sina ha lufitile mwahala masika. Mi, nako kaufela, li tukiswa ka ponahazo ya Liseli ye monyeha mwa—mwa Bupilo bo buli mwa Peu.

<sup>27</sup> Ka Linzwi la Mulimu, lizazi la benya kacenu, kakuli ona lizazi luli le lu ikola ki Linzwi la Mulimu le li bonahalile. Ona liseli la lizazi le lu bona fande le ha ki sesiñwi kono ki Linzwi la Mulimu, ha Na bulezi kuli, “Ha ku be liseli.”

<sup>28</sup> Mi ku cwani kambe Na bulezi kuli, “Ha ku be liseli,” mi kwatokwa kuba liseli? Konakuli ne si Mulimu ya na bulezi. Mulimu ha bulela kuli, “Ha ku be,” ku kaba. Mi kacwalo lu fumana kuli lizazi le lu sweli kuikola ki ponahazo ya Linzwi la Mulimu le li bulezwi mwa Genese.

<sup>29</sup> Mi lu lemuha kuli Liseli la Mulimu la lizazi le ki Mwana Hae. Yena yanali l-i-z-a-z-i; yo ki M-w-a-n-a. M-w-a-n-a ki Bibele. Na li . . . “Kwa simuluho nekuna ni Linzwi, Linzwi nali ku Mulimu, mi Linzwi neli Mulimu.” Maheberu 13:8, “Yena wa swana maabani, kacenu, ni kuyakuile.” Ki Linzwi la Mulimu, kamita. Neli Kreste ku Nuwe. Neli Kreste ku Mushe. Neli Kreste ku Davida yana talimile mwahalimu, sina mulena ya hanilwe, fa munzi; koo, lilimo ze mianda ye ketalizoho ka ye milalu kasamulaho, Kreste nainzi fani inza lilela munzi, kakuba Mulena ya hanilwe, inge fela Davida mwa na bezi. Kamita ki Moya wa Kreste. Mi ponahazo yetezi ya Linzwi la Mulimu ya zibahala ka Jesu Kreste, ona Moya wa Mulimu.

<sup>30</sup> Hakuna bupilo bo bukona kutaha kwanda liseli. Liseli kona le litisa; liseli litisa bupilo. Haku koni kuba bupilo—bupilo kwande a liseli, za nama kamba za moyo. Ku lukela kuba cwalo.

<sup>31</sup> Mi Liseli fela li kona kutaha ka Linzwi la Mulimu. Linzwi la Mulimu kona Liseli ha Li bonahalile. Ki Peu fela yeliteni mo, sina Mulimu mwa na calezi lipeu kaufela.

<sup>32</sup> Mibili ya luna neili mwa lifasi ku si kaba kale . . . kihande, kihande, ku si kaba kale liseli fa, bupilo bufi kaufela fa, kamba sika kaufela; kausiamu, potashi, petroliamu, ni liseli la kozimiki,

seo kaufela, nesili sona fa—fa fani Mulimu hana bupile lifasi. Ne si lwezi fela Linzwi la Hae le li bulezwi ku litisa mi la iponahaza, kuswana fela inge bupilo bwa limela, kamba bupilo bwa kota, sikamañi, kamba bupilo kaufela bo bu lukela kuba teñi.

<sup>33</sup> Hakuna se si kona kupila, ka nama kamba ka moyo, kusina Liseli la Hae, mi Linzwi la Hae ki Liseli ni Bupilo.

<sup>34</sup> Kono cwale Ha luma Liseli la Hae ni ku Li zibahalisa kwa sicaba, mi kipeto Li haniwa, cwale kucwani he ka zeo? Sani kona se lubata kuambola fateni kakusasana cwana, ki kuli: ku hana Liseli le, ka bona Li lomezwi ku bona, ku ba hana sina mo ne kuinezi ka nako yani. “Amubone mutanga Ka, Mo Ni katelwa kuina.” Ki yena Liseli ku Bamacaba. Ki yena Liseli kwa lifasi. Nali yena Liseli la lifasi, kono Na hanilwe. Sani kona siemba se si tomola pilu.

<sup>35</sup> Mi li kopana ni buino bwani nako kaufela yeo Mulimu a bonahalisa Liseli la Hae, lifasi lona kasibili li hana liseli lani. Kiñi? Ku ñozwi mwa Bibele. Lusika lufi ni lufi, Mulimu utomile hahulu zeñata za Linzwi la Hae kwa lusika lufi ni lufi, mi Yena kamita ulumanga mutu kuli abonahalise Linzwi lani.

<sup>36</sup> Jesu na polofitilwe ka myaha ye likiti zene, kuli Uka taha, Mesia. Mi cwale Ha taha, A bonahalisa sepiso kaufela ya Mesia. Kono niteñi sicaba sa lifasi, likeleke, ni zeñwi cwalo, ne li si ka ziba sika ka Yena, kacwalo, kakuli ne se bakeni kale mwa lika zeñwi ze ne ba paleliswa kuziba Se. Cwale kucwani haiba—haiba mutu fela . . .

<sup>37</sup> Lu ka nga siemba sa nama. Ku cwani haiba mutu, ya pepezwi fa kuli a zamaye mwa liseli la lizazi lani, la mu bupezi Mulimu, mi, taba yapili mwa ziba, u kwala meto a hae, u matela mwa malibela, u kwala sikwalo, u ikapesa militi, mi uhana fela kulemuha kuli lizazi la monyehe? U latula matohonolo a lona. U latula mamonyi a lona a futumala, mukwa wa kufa bupilo bwa ona. Wa latula liseli le li hasana ili kuli abone kwa ya, kwa na zwelela. Wa latula sani. Kisikamañi so kona kubulela ku mutu ya wisezafafasi miluti, kamba ku matela mwa ndu ya fafasi ni kukwala liseli kaufela, kai ni kai, mi u hana fela kulemuha kuli lizazi ne li benya? Kuna ni se si fosahalile mwa booko bwa mutu yoo. Mañi ni mañi wa ziba cwalo. Ngana ya butu ika mi bulelela kuli kuna ni se si fosahalile ku mutu yoo, kuli u cwalo, ki—ki . . . Sesiñwi si ezahalile ku yena. U latehezwi ki libaka za hae.

<sup>38</sup> Kihande, kona mo kuinezi mwa lihola ze lupila ku zona, foo mutu ha ka i kapesa ka mufuta omuñwi wa—wa buinyazo, ka kulemuha Liseli la Evangeli sina mo Li monyehela sina mo Li inezi kacenu. Mi mutu ha zwa Kwateni ka boomu fela, ukena mwa sika sesiñwi ni kuhohela masila fafasi, uli, “Ha ni Li lumeli,” kuna ni se si fosahalile ni mutu yoo. Hakuna fela mukwa wa ku likekuluhha. Kuna ni se si fosahalile. Kuna ni se si ezahalile

ku yena. Mi lu fumana kuli kuna ni zeñata hahulu, zeñata hahulu za zeo kacenu.

<sup>39</sup> Cwale, Jesu nali bupaki bwa bapolofita kaufela bo bu susumelizwe. Mi sиполofита sa bona kaufela sa tiswa kwa Liseli mwa lusika lwa Hae, sene si polofitilwe mwa lusika lwa Hae. A tukisa kandela kaufela ya Linzwi yeneli mwa Bibele, yene polofitilwe ka Yena. "Mwalanjo uka itwala." Na itwezi. Ku lukile. "Libizo la Hae uka bizwa Muelezi, Mulena wa Kozo, Mulimu Yamata, Ndate wa Kamita." Nali cwalo. "Mi meto a libofu aka bona." Neba boni. Lika kaufela ze ne polofitilwe ka Yena, za ezahala ha Na tile mwa lifasi.

<sup>40</sup> Mi kiñi sicaba hane si sa boni cwalo, sani neli... Ku bonahala bunca ku luna cwale, kakuli lu talima kwa mulaho mwa siiponi sa kwa mulaho. Kono kana mukile mwa ziba, haiba mu tundamena kutalima kwa mulaho kafoo, muka ba ni kozi? Ha lu talimeñi se si lu yemezi.

<sup>41</sup> Sani kona sene ba eza. Libaka lene ba ezelize sani, kakuli neba pila mwa mbengenge ya liseli lisili. Neku pila mwa mbengenge ya liseli la lizazi lisili.

<sup>42</sup> Mi sani kona se Ni lumela kuli kona taba yeli ni lifasi kacenu, balikani, kakuli lu lika kupila mwa mbengenge ya liseli lene li monyeha mwa lizazi lisili. Mbengenge ki liseli la buhata.

<sup>43</sup> Kuswana fela sina mukamo o nanuha fa mukwakwa. Lu ya mwa mukwakwa lu yo bona pono ye nanuha. Ki mubonelo wa buhata wa lizazi. Mi ha mu fita fani, ha li bonisi sika kaufela kwanda buhata fela. Kakuli, hamukoni ku zamaya mwa mbengenge ya mbundu ya lizazi, kakuli ki mbengenge ya mukamo, kamita inze i mi bonisa nto ye si cwalo.

<sup>44</sup> Mi cwale sicaba ha si lika ku mi bulelela kuli Jesu Kreste ha swani maabani, kacenu, ni kuyakuile, ba ku isa mwa mukamo o nanuha. Ku felile. Mi ha mu kena mwa keleke ni kuikopanya kwa keleke, lituto zeñwi za litumelo kamba nto yeñwi ye cwalo, hakuna sina mwani, mane ha si shutani ni so no banga ni sona mwa lifasi.

<sup>45</sup> Mutuhele ni mi bulelele. Musike mwa hana Liseli la Evangelii ya Jesu Kreste, o tisa mamonyi a futumala a Moya o Kenile ku wena, a ku eza kuba sibupiwa sesinca ku Kreste Jesu. Musike mwa lika kuzamaya mwa mbengenge ya lusika lusili. Cwale, mbundu yani hakulata neibile fela hande mwa lusika loluñwi, ne ikona kuba fela nto yende ku bona.

<sup>46</sup> Ne ku bonahalile cwalo mwa lizazi la Mulena luna Jesu. Nali yena Liseli la Mañolo la lizazi lani. Nali yena Liseli. Na si yena Liseli kufitela A taha mwa lifasi ku to paka Linzwi la sepiso. Mwa ziba, Na bulezi mwani kuli, "Joani nali liseli le li monyeha le li benya, mi mwa lata kuzamaya mwa liseli la hae fa nako nyana."

<sup>47</sup> Kaniti, kakuli Joani na polofitilwe ka Isaya, myaha ye mianda ye sebene ni ye twelufu asika pepwa kale, kuli, “Linzwi la ya huweleza mwa lihalaua.” Mi hape ni Malaki, wa mafelelezo kwa bapolofita, myaha ye mianda yemine kusikaba kale kutaha kwa hae, mwa kauhanyo ya 3 ya Mal-... ya Malaki, na ize, “Amubone, Ni luma numwana wa Ka fapila Ka, kuli alukise nzila.”

<sup>48</sup> Fa nekuna ni Joani fa lifasi, yana eza Linzwi le li ñozwi lani kuba lelipila. Nali linzwi la ya huweleza mwa lihalaua, mi ki ha kalisa... hape na sweli kulukisa nzila fapila Mesia. Mi Jesu ali, “No lata kuzamaya mwa liseli la hae, kakuli nali yena liseli lani, liseli le li benya.”

<sup>49</sup> Mi Joani, ki hali, “Cwale Ni lukela ku kusufala, liseli laka lina ni kutima, kakuli (kiñi?) Ni se ni sebelelize nako yaka ye polofitilwe ka na. Mu Mu utwe! Ki yena Luli. Mu Mulatelele.” La pila mwa lizazi lani, ne i pakile se.

<sup>50</sup> Cwale, Majuda ne ba hupula kuli ne ba lapela mwa Liseli la niti. Ne ba hupula kuli ne ba lapela, yena Mulimu ya swana yo yene ba sweli kuhana. Yena luli yene ba hupula kuli ne ba lapela, ne ba takisa. Ne ba sweli kuseha Mulimu luli, ni ku Mu bona bukuba kwa sicaba, yena Mulimu luli yene ba hupula kuli ne ba lapela.

<sup>51</sup> Mutuhele Ni bulele se ka likute ni ka likute, kono ka kutisa Liseli, kakuli, sina muzwale wa luna ha bulezi fa nako nyana yefitile, nako yelupila haisali yetelele kufita mo mu nahanelo. Leliñwi la mazazi aa sesiñwi si ka ezahala, nako ikabe ifelile. Sicaba si ka nga nombolo ya sibatana, mane ba sa zibi se ba eza. “Sibofu si etelela sibofu sesiñwi, kaufela bona ba ka wela mwa musima,” Jesu abulela. Mi lupila kasamulaho kufita mo lu nahanelo. Batu babañata baba sepahala ba latelelanga sani, mane ba sa zibi se ba eza.

<sup>52</sup> Kono hola i sutelezi cwale foo Liseli ha li monyeha, ili Liseli la Evangelii, mwa mata a Lona a zuho ya Jesu Kreste, inza iponahaza Iliyena kuli Jesu Kreste ki ya swana maabani, kacenu, ni kuyakuile. Na tomahanyize sani mwa lizazi le. Lik za Na sepisize mwa lizazi le li lukela ku ezahala mwa lizazi le. Haiba keleke haina ku Li amuhela, Mulimu wakona kueza kuli kwa macwe aa azuse bana ba Abraham. U ka feza Liñusa la Hae, kakuli Yena kamita uezize ona cwalo. Ukana a ezanga ona cwalo.

<sup>53</sup> Batu ba nahana kuli ba zamaya mwa Liseli, lizo za bashemi, mi, taba yapili mwa ziba, ba zamaya mwa mbengenge ya liseli, isiñi Liseli le li swana, ba hana Liseli luli le ba ipapata kuli ba lapela.

<sup>54</sup> Misebezi ya hae ne i paka hande Yo nali Yena. Jesu naize, yena Kasibili, “Mubale Mañolo, kakuli ku Ona muhupula kuli muna ni Bupilo Bobusafeli, mi ki Ona A paka za Ka. Ki mañi

yakona ku Ni nyaza ka sibi?" Ki hali, "Ki mañi yakona kupaka kuli Ni bulezi sika kaufela, kamba buipuleli kaufela bo Ni bulezi, kuli Ndate wa Lihalimu ha si ka paka zeo ku Na?" U bonisize ku wena kuli Nali yena Liseli la hola, kakuli kaufela ne ku polofitilwe kuli Mesia yo ulukela kuba ka nzila ye, mi fa kutaha Bupilo bo bu liuluzwi, kono lizo za bona ne li ba kauhanyize kwa Liseli la niti la Linzwi.

<sup>55</sup> Bafalisi, Basaduki, Baheroda, ni bao kaufela bakona kuba bona, ne ba bile ni lifasi le li sikami hahulu, sina mo ne ba ezelize mwa masika kaufela, kuli ne ba si ka bona Liseli la niti. Ne li ti lo tima meeto a bona fande. Ne ba itusisa kuzamaya mwa mbengenge ya mbundu, "Zazi lelitatama ku kaba *cwana*, mi kamuso ku kaba *cwana*. Lu ka i kopanya ku *se*, mi ikaba *sani*. Lu ka ikopanya ku *sani*." Lu fumana kuli ki pono ya buhata.

<sup>56</sup> Jesu Kreste ki wa niti fela kacenu, kwa pilu ya butu, sina mwa Na bezi kamita. Mata a Hae ni Pata ya Hae yepila ki ya niti fela kacenu sina mo ne kuinezi kamita. "Amubone, fa nako nyana, lifasi halina ku Ni bona hape. Kosmos, 'muezeko wa lifasi,' halina ku Ni bona hape. Ibo, mu ka Ni bona; kakuli Ni kaba ni mina, mane mwahala mina, kuisa kwa mafelelezo a lifasi. Misebezi ye Ni eza mu ka i eza ni mina, mane yemituna ku ye ki ye muka eza, kakuli Ni ya Ku Ndate."

<sup>57</sup> Yona sepiso tuna yani ki kacenu. Lifasi ki la bubofu mo likona kubela, kono kuna ni "mina mu ka Ni bona," mi seo kona se lu lika kuba ni sona kacenu. Seo Evangelisti, italusa, ki kubonisa Jesu Kreste mwa mata a zuho ya Hae, ni mutalelela kaufela wa lisepiso za Hae; kuli Moya o Kenile u bonahalise lika ze ni ku lieza hande, kuli Mulimu u sepi size, mi Uka eza cwalo. Eeni, sha.

<sup>58</sup> Na pakilwe hande ka swanelo ka—ka Linzwi ni ka misebezi ya Na eza, kono hakuna ni yomukana wa bona yana bata ku li lumela. Kubonisa kuli Liseli la Hae neli Linzwi! Linzwi ne li bulezi kuli, "Mubale Mañolo."

<sup>59</sup> Kono lizo za bona zene ba pila ku zona, neli mbengenge ya lusika lusili! Se bali, "Lu lumela Mushe; Mushe yo lu lumela. Ha lu zibi ko U zwelela wena. Ki kai ko U ngile tuto ya Hao? Ki sikamañi So kona kubonisa kuli U *Se*?"

<sup>60</sup> Misebezi ya Hae ne i paka Yo nali Yena, kambe ne ba ka bala fela Bibele. Ne ba I bala, kono ne ba si ka I bona. "Misebezi yaka ya Ni paka."

<sup>61</sup> Mutu wa ziba ka mapampili a hae, mapampili a Linzwi la Mulimu, haiba u lumilwe ka Linzwi la Mulimu ni ka Linzwi la Mulimu. Kwa swana mwa lusika lufi kaufela! Kubile cwalo kamita.

<sup>62</sup> Halukoni kupila ka liseli la maabani. Liseli la maabani ki la kale. Hakuna se lu ziba ka lona. Hamukoni ku futumala kacenu ka lizazi le ne li monyeha maabani. Bwani kona butata bo buli

ni likeleke kacenu. Bwani kona butata bobuli ni sicaba, balika kupila ka sene si ezahalile maabani. Hamukoni ku futumazwa ki mulilo o pentilwe. Batili kutokwa, hauna mufutumala ku ona. Lizazi la maabani halina mufutumala ku ona.

<sup>63</sup> Liseli la lizazi li lumezwi mwa lifasi, mwa nama, ku to buzwisa peu kwa kutulo. Zazi ni zazi litisa lizazi lelinca. Lizazi le li monyeha kacenu, litisa buloto mwa Canada; ona lizazi leliswana lani, kihande, kambe ne li si ka...ne li sina lizazi ni lelikana, yona Sikulu ye kamba Muyana, neiske ya buzwisa peu. I lukela kuba ye tille mi ye mata hahulu, zazi ni zazi ya hula ni kuhula, kutisa peu ku yona.

<sup>64</sup> Cwale haiba bubeke, bona kasibili, haiba bukala kuhula, peu itaha cwalo, haiba ika ina hande ni peu, ika yaha fela bubeke. Zazi ni zazi, sikapi se si kwahezi fateni, siemba sa—sa kalsiamu ni kaufela ze zamaelela kuyona, kona se si bupa bubeke, lizazi ha linze liya litiya.

<sup>65</sup> Kono munge lizazi le li monyehanga ka Muyana, ni ku li beya fa buloto kacenu, ne li ka bu bulaya. Kaniti, hamukoni kueza cwalo. Lina ni kutaha mwa mwaha wateni. Kona ni buloto bwa Mulimu mo bu lukela ku buzwisa mwa mwaha wateni, mwaha wateni mo U inezi. Kono cwale lizazi likona kuba cwani... Kihande, buloto bu ka shwa, miselo ya shwa, ka lizazi le lipila kacenu, le li monyeha kacenu, nitaluse. Kutulo ya yona ya taha ya buzwisa. Peu i lukela kuhula ni liseli.

<sup>66</sup> Kono taba yateni ki kuli, kacenu, peu ya keleke hailati kuhula. I bata kuina sina mo ne kuinezi kwa mulaho mwa nako ya Moody, Sankey, Finney, Knox, Calvin. Ne ba iketile, nebali liseli la hola.

<sup>67</sup> Kono ye ki hola yeñwi. Le ki lizazi lisili. Ye kona zwelopili ya Evangel; Itaha kwa kuhula kwa yona. Kacwalo halukoni kupila ku sa na bulez Luther, Wesley naize, kamba babañwi ba bona. Lu pila mwa Liseli le li bulezwi mwa lizazi le. Lu mwa lusika lwa keleke ya busebene, isiñi lusika lwa keleke ya bulalu kamba yabune. Peu yakona ku I amuhela. Haiba ha i ezi cwalo, ikawa kwateni mi hakuna se I talusa. Peu i hula ka Liseli haiba i zwelapili ni Liseli.

<sup>68</sup> Kona ni keleke mo i lukela kubela ni sinkwa sa lusika lufi ni lufi, kuli Jesu na laezi, kuli, "Mutu uka pila ka Linzwi kaufela le li zwelela mwa mulomo wa Mulimu."

<sup>69</sup> Sinkwa se lu tokwa si mwa Bibele. Ki sinulo yetezi ya mulelo wa Mulimu. Ki sinulo yetezi ya Jesu Kreste. Hakuna se lu ekeza ku Yona, kamba kuzwisa sika ku Yona; yo kaufela ya ka eza cwalo, libizo la hae lia zwiswa mwa Buka ya Bupilo. Ha lu tokwi lituto za litumelo kuli li ekeze Se. Ku ñozwi ona cwalo fela mo Li lukela kubela. Ha lu ekezi sika ku Lona, ku zusa sika ku Lona, ku Li kutaza ona cwalo fela mo Li inezi, mi Mulimu u cwalo, uka li bonahalisa. Sepiso kaufela ya Na sepisize, U ka i bonahalisa

fela ka kuswana. Ha lu lukeli kuzwisa ku Lona kamba kuekeza ku Lona. Mu Li siye fela ona cwalo mo Li inez.

<sup>70</sup> Kono, mwa bona, kacenu, lu fumana sicaba inge mo ne kuinezi mwa lizazi lani, bene balika kupila mwa mbengenge ya mbundu. Keleke i lukela kubuzwa sina buloto mo bu buzweza, “kuli mutu uka pila ka buhobe fela, kono ka Linzwi la Mulimu kaufela, ona Sinkwa sa Bupilo.” Isiñi fela siemba sa Manzwi; Linzwi la Mulimu kaufela, lusika lufi kaufela! Fela musike mwa ina ni kuca manawa ni makwili ka nako kaufela. Kuna ni lika zeñwi ze zamaelela ni zona, halunze lukena mwa butungi bwa Mulalelo wa Mulimu o mutuna o tomilwe fapila sicaba sa Hae, mata a Moya o Kenile, ku—ku nyakalala kwa Ona, ka mata ni Moya o filwe. “Misebezi ye Ni eza mu ka i eza ni mina. Kakuli Na pila, ni mina mu ka pila cwalo.” Lisepiso za na file Jesu kwa Keleke ya Hae, mi ibo kacenu lufumana batu balika kukena mwa lusika loluñwi lo lu fitile.

<sup>71</sup> Lusika lwa Luther, neli lusika lo lutuna. A bona muzamao wa keleke ya Katolika, abona mulalelo. Kuli, muprisita wa mwanana yani, na boni kuli sani ne si fosahalile, “ne si mubili tenyene wa Kreste,” neli siemba sa sinkwa sene—sene ba fuyozi. Mi abona kuli, “veine ne si Mali sakata,” kono ne i yemela Mali. Kacwalo a hana lika zani kakuli hola ya nako yani ne ili fani. Mi hakuna taba kamba neli baprisita babakai bene ba nani, ni zeñwi kaufela zene ba nani, Mulimu na sweli muuna yana kona ku monyeha liseli. Amen. Na amuhezi, “Kuluka ka tumelo,” mi a eza liseli la lusika lwa ba Lutheran kuli libenye. Kuzwa fani kwa taha, zani za pila nako ya zona hande.

<sup>72</sup> Kwa taha nako yeñwi yeo keleke i lukela kuzwa kwa libi za yona, ni ku keniswa. Hasamulaho kwa taha John Wesley, muuna yomunyinyani wa Anglican kuzwa kwani kwa England, yani neli ya keleke ya ba Anglican, kono na boni liseli fa Evangel. Neli yona hola ya Lusika lwa Filadelfia lwani mo ne lu lukela kutahela. Mi ha na ezize cwalo, a kutaza misebezi ya bubeli ya sishemo, kukeniswa ka Mali a Jesu Kreste. Nekusina sene si ka yema mwa liseli la lona. Na talimwa kuli mufitelezi wa tumelo sina Luther mwa na inez, kono na hanyelize babañwi ba bona, ni ku monyeha liseli, kakuli neli liseli la hola. Mulimu na fumani muuna, John Wesley, yana kona kutukisa liseli.

A fumana kuli . . . mi hape ni Luther, ya na tukisize liseli la lusika lwani.

<sup>73</sup> Mi kasamulaho kwa taha mizwale ba Pentekota. Ba kutela mwa lusika lwa bona, kwa kukutisezwa kwa limpo, ku kutisa limpo, za kubulela ka malimi, limpo za ku folisa, ni lika zeñwi kwa keleke. Cwale, ne ba ezize fela ona cwalo sa na bulezi Mañolo kuli ne ba ka eza, mi, ba si no eza cwalo, ba li bonahalisa. Yeo luli ki niti.

<sup>74</sup> Kono kana mu lemuhile kuli lu zwile ku zona? Lu mwa nako ya Munyaliwa, nako ya kuketa, nako yeo (Munyaliwa) ne ba bulezi kuli lu kaba ni yona. “Sibaka kaufela se si siyezi,” kwa bulela Joele 2:28, “sibaka kaufela se si siyezi, si—si cilwe ki nziye; mi nziye kaufela ye siyezi, nziye yekima.”

<sup>75</sup> Yeñwi ni yeñwi ya likopano zani, haiba mu balile Maswayo Asupa a Bibebe, ufi ni ufi wa baongaongi bani na i lo kutaza Linzwi, kono na siile nto yeñwi. Mi ki sikamañi sene ba ezize kasamulaho wa baongaongi, mi liseli la kala kutima? Mwa sibaka sa ku zamaya kukena mwa Liseli le li pahami, ba li ongaonga. Mi hane ba iongaongile, “Lwa lumela Liseli *le*. *Le* kona Liseli! *Le* ki Lona.” Ki sikamañi sene ba ezize? Wesley ataha cwalo mi azwa ku bona.

<sup>76</sup> Ki sikamañi sa na ezize Wesley? A mu ongaonga, ni mu—mu muzwale wa hae, John ni—ni Charles, mi kasamulaho kwataha Asbury ni babañwi, mi, kasamulaho wa mazazi a bona, ba ongaonga se ne si bizwa kuli keleke ya Methodist. Ki sikamañi se ne ba ezize? Ne ba hanile Liseli la kwapili. Ne ba bulezi fela kuli, “*Le* ki Liseli. *Se* ki Sona.”

<sup>77</sup> Mi ki ha kutaha Mapentekota ni ku ba bonisa, kuli Mulimu u sa luma kolobezo ya Moya o Kenile. U sa tisa mata a Hae a kufolisa, ao ba latuzi. Ki sikamañi sene ba ezize? Neba zamaile kuzwa mwahala bona, kakuli neli liseli lisili.

<sup>78</sup> Ki sikamañi seo cwale? Lu fitelezi myaha ye mashumi asilezi, Mapentekota ba ikonga kongile, “Ki luna *ba*, ki luna *ba*,” mi Mulimu u zamaile kuzwa ku zona; kwande koo, ni kutisa Munyaliwa, Muketwa, ya zwa mwa sikuwata sani. Ili, mane hakuna kuba lusika loluñwi lwa keleke. Lusika lwa Keleke ya Filadelfia neli Wesley. Mi Lusika lwa Keleke ya Laodesia ki kopano ya Pentekota, ye zamaeleta hande ni nombolo ya sibatana. Yeo kona Bibebe, sina muzwale yo ha na bulela fa nako nyana yefitile. Yeo ki niti. Luli. Bona, likopano zani kaufela, kakuli ne ba hanile kuzamaya mwa Liseli la kwapili. Ba ikongakonga ili bona, ni kubulela kuli, “Lwa lumela *se*.” Mulimu ha eza sika, mu si tatube ka Mañolo.

<sup>79</sup> Bafarisi ne baize, “Luna ni Ona.” Basaduki bali, “Luna ni Ona.” Kono Mulimu nana ni Sona! Mulimu u fetuzi sinotolo ni kubonisa Liseli. Ne li hanilwe sina mo Libelanga kamita.

<sup>80</sup> Keleke ya Katolika ne i hanile Luther. Wesley na hanile Luther. Mi kacwalo hape ni Mapentekota ba hana Wesley.

<sup>81</sup> Mi Moya o Kenile kacenu uhana Mapentekota. U ba fela ya fokola ni ya bata sina babañwi ba bona kaufela. Mañi ni mañi wakona kubona cwalo. Na mi lata. Ki mina nto ye fa kaufi hahulu ku ze liteni mwa Bibebe, Na ziba, kona ha Ni li ni mina. Kono, muteeleze, mukwalule meeto a mina mi mubone lizazi le lupila ku Iona! Seli nako ya kuli sinotolo si sikuluhe hape, ni Liseli le litaha cwalo, ku to nga Kota. Bibebe ibulezi cwana, mwa

Malaki 4, "Uka luma ni ku kutisa hape Tumelo ya makalelo yeneli ni sicaba." Na sepe size cwalo. U li ezize kamita. Na lumile Linzwi la Hae, mi bapolofita ba taha kakuli Linzwi ne li tile kwa bapolofita, mi neba na ni Linzwi ni ku Li eza kuba leli pila.

<sup>82</sup> Likopano ni milao ya nako ne li ba hanile, lusika lufi kaufela, kona mo ba ka ezeza ni kacenu. Mulimu wakona ka nako yeo kacenu kuzusa mutu cwale sina mwa Na inezi nako yani. Na si ka zusa likopano zani. Mubuze wa litaba za kale kaufela, mutualime mwa litaba za kale; fani kopano hane i ongaongilwe, ne ishwela ona fani mi ne i si ka zuha hape. Mulimu ubulela ku mañi ni mañi. Kiniti.

<sup>83</sup> Mi Mulimu na sepe size kueza cwalo hape mwa mazazi a maungulo, mi ona seo kona Sa ka eza. Sa sepe size Mulimu, kona Sa ka eza, kuli sifetule Liseli leli kona kupaka Mañolo a sepe so a kacenu. Jesu naize, "Sina mo ne kuinezi mwa mazazi a—a Lota, kona mo ku kabela ni ha taha Mwana mutu." Mu bonise, mwa bona se ba sweli kueza. Mutualime ku Jehova, sa Na ezize, Ndata luna ubeile lika kaufela mwa sibaka.

<sup>84</sup> Yani ki Lota mwa lifasi mwani, kulo kwani mwa Sodoma, ni sibi kaufela, kuenya fela. Ki yani mulumiwa kwani ya sweli kukutaza ku yena, hape.

<sup>85</sup> Kuna ni sikkwata sa Abrahama, bona Baketwa, ba hohiwa, bona baba na ni sepe so, ba libelezi luli Mwana. Lota na libelela mwana, hape, kono isiñi mwa mufuta wa na mu bata Abrahama. Ki sikamañi sene si ezahalile? Li si ka ezahala kale, Mulimu ataha fafasi ku to iponahaza Iliyena mwa nama, ni kubulela kuli Nali yena Linzwi, kakuli, "Linzwi la Mulimu li buhali kufita mukwale o lozizwe kafa ni kafa, mi li lemuha milelo ya mwa pilu." Jesu naize, "Kona mo ku kabela hape, ka kutaha kwa Mwana mutu." Lisepiso ze ki za Bumulimu, ne li bulezwi ka milomo ya Jesu Kreste. Sibeli sa lihalimu ni lifasi li ka palelwa, kono Halina ku palelwa. Mulimu u sa kona kuzusa bana ba Abrahama kwa macwe. Oh, eeni!

<sup>86</sup> Lu mwa musipili wa luna, lu swana sina Isilaele mwa na bezi. Isilaele, mwa musipili wa bona, neba na ni kuba ni manna yenca zazi ni zazi, kakuli manna yenca neiwanga. Ha lu lukeli kupila mwa liseli la Luther, kupila mwa liseli la—la Wesley, kamba kupila mwa liseli la Pentekota. Lu mwa lusika lusili, Manna yenca.

<sup>87</sup> Ki sikamañi sene si ezahalile hane ba ka lika kubuluka maana yani? Ne i tampakani. Ne li ka ba bulaya. Kona libaka ha luna ni babañata hahulu baba shwile ba moyo, baba ipiza kuli Bakreste. Ba sweli kuca mbengenge ya mbundu ya lizazi lisili. Ba ca manna ye tampakani ye shashize kale. Kuswana fela sina sikapi fahalimwa buloto, haiba ha si keni mwa buloto, si ka zwa mwa buloto. Mi cwale Liseli ha li hanilwe, hakuna sika kwanda nto iliñwi fela ya kueza, ku sikuluhela kwa lififi. Kalulo

ifi kaufela ya busihu, ye ka hana kubona Liseli, i na ni kukutela mwa lififi. Kona mo kuinezi ni mwa Evangelii, mwa lusika lufi ni lufi ku pakilwe kuba cwalo. Lu pila mwa nako yani.

<sup>88</sup> Manna ya maabani i shashize. Ni utwa batu haba bulela kuli, “Myaha ye mashumi amane kwa mulaho, Ni ezize sa *kuli-ni-kuli*.” Yeo ki niti, kono kucwani he kacenu? Kucwani he ka keleke ye tuka mulilo? Lu ambola za maabani, kucwani he ka keleke kacenu? Kucwani he ku wena kakuba unosi kacenu? Kakuli, maabani haina ku ezeza za kacenu. Ne li nto yende maabani.

<sup>89</sup> Liñusa la Luther neli liseli la hola, sina la Joani mo ne li bezi, kono kwa taha liseli lelituna. Kona mwa na bezi ni Luther liseli lelituna, mi lwa mu tabela fa nako nyana, kono kwa taha liseli leliñwi lene li timile. Sene si lukela kueza ne si zamaelea ni Sona; mi Sa ya kwa sinkwa se si petehile, ba kena mwa Manna ye petehile ya Mulimu. Kono ki sikamañi sene ba ezize? Ba ikongakonga. Mutu ukeni ku zona. Mwa sibaka sa kuli Mulimu a i zamaisa, mutu ni milao ya hae akena ku zona, a li foufaza.

<sup>90</sup> Oh, ona Kota ya Munyaliwa ye kacenu, i kokolilwe. Mutai kaufela o sa beyi muselo u kokoliwa. Jesu na bulezi cwalo, Muñoli Joani 15. Ki sikamañi se si ezahalile cwale, lu bona kuli ne ba lemilwe kwateni, ba kokola kwateni.

<sup>91</sup> Muhupule, ona pilu luli ya kota i mwahala kota. Muselo kamita u ka buzwisa, sibaka sa mafelelezo ko kota ika beya miselo, si fahalimwa yona luli, kakuli ki bunca bo bu zwelela mwahala bupilo bobuli mwa peu.

<sup>92</sup> Ki Kota ya Munyaliwa. Jesu nali Munyaliwa, Nali yena Kota. Ba Mu bulaya. Nali yena Kota ya Bupilo yene liteni mwa simu ya Edeni. Ba Mu bulaya ni ku Mu paheka fa kota ya Siroma, kuli ba Mu bone bukuba. Ki sikamañi sa Na ezize? Mulimu na Mu zusize ka zazi la bulalu, kuzwa kwa bafu. Mi kacenu kuna ni Kota ya Munyaliwa; Ne i kalezi kwa mulaho kwani kwa simuluho, kwa mulaho kwani ka Lizazi la Pentekota.

<sup>93</sup> Muteeleze, mina sicaba baba fumaneha kwa keleke! Keleke neisika kalela kwa Nicaea, Rome. Ne i kalezi mwa Jerusalema, ka Lizazi la Pentekota, ya kalisa Keleke. Mi cwale ki sikamañi sene ba ezize? Ne ba zwezipili fela ku ongaonga; mi Mulimu azwelapili kulemaka kwateni mitai. Mi se ba ongaonga ma Lutheran; ku pumaka mitai. Wesley; a lema kwateni mitai. Pentekota; a lema kwateni mitai. Kufitela i taha . . .

<sup>94</sup> Kono Mulimu ukaba ni Kota ya Munyaliwa! “Kaufela ze cilwe ki nziye ni ze cilwe ki sishenyi, Ni ka kutiseza,” kubulela Mulena. Malaki 4 ya lu bulelela kuli lu ka kutiswa kwa Tumelo ya makalelo sina mo ne kuinezi ka Lizazi la Pentekota, “ki Tumelo ya bashemi.” Lu lumela kuli i ka taha. Ni lumela kuli seli nako ya yona cwale. Mitai i kokonyani mi i omile, mi ba ka zwiswa kwa Kota, ili kuli muselo ukone kubeya ili ona fahalimwa Kota. Oh, mawi!

<sup>95</sup> Ona maseli a kaufela a lukile. Keleke kacenu kona liseli lani hamoho ni se i amuhezi kacenu. Ki kufeleteza kutulo. Sina ha lu fumana cwana, kuli Kota kasibili, kamba . . . Buloto bu lukela kuhula ni Liseli, kuzuha kwa kuba litali ni kuba bubeke, ni kuzwa kwa bubeke kuhula cwalo. I taha ihula ka Liseli. Liseli la masika amañwi li pakelana fela ni lusika loo. Liseli la Luther ne li pakile za—za liseli la Wesley. Wesley na lwezi liseli la Pentekota. Ki liseli le li swana, lene li hulile fela ka Liseli. Kambe sicaba ne si ka li bona fela!

<sup>96</sup> Nako yeñwi yefitile, Ne ni sweli kubala taba yeñwi, fami mulena wa musali wa kwa England, (isiñi mulena wa musali yo) mulena yomuñwi wa musali, na ilo bona katengo ka mapampili kene ka panga mapampili amande cwalo. Mi ha na buziwa lipuzo ki mueteleli wa kampani, a mufitisa mwateni. Na bata kubona pampili yende yani mo ne i pangelwa. A muisa kwa muluti mo ne kuna ni mapepa amañata ni zeñwi. Mi mwa mazazi ani, ne ba panganga mapepa fa masila. Lwa hupula zeo hande. Kacwalo akena mwa muzuzu ni ku yo kwalula sikkalo, mi nekusina sika kwanda libunda la masila sila. Mulena wa musali, inza komokile, ali, “Ki likamañi ze masila zee?”

<sup>97</sup> Muuna yani . . . mueteleli wa sikkata, ali, “Zeo neli litino, maabani. Mwabona, se libile masila. Ha lu li yumbangi lika ze, kono ki pampili ya kamuso.”

Musali ali, “Ha ni utwisisi.”

Ki hali, “U ka utwisisa kamuso.”

<sup>98</sup> Kacwalo ha ba fitisa masila ani mwa mushini wani, mwa sibaka sesiñwi sa ku keniseza, mi—mi ni mokuñwi mo ne lifitile mwani, neli ka swanelo; ha li to zwa, neli ma pampili amande a pampili. Mueteleli wa naha na hupula kuli na ka bonisa mulena wa musali sika sa na sa zibi. A beya siswaniso sa hae fateni, ni ku si swaniseza fa pampili yende ye. Mulena wa musali ha na u amuhezi, mi ki ha bona siswaniso ku ze ne li masila a masila, maabani, kakuli ne i keni mwa buino busili.

<sup>99</sup> Oh, haiba Luther, Wesley, ni babañwi kaufela, ne ba ka bona cwalo, litaba za maabani zakona kuitusiswa sina mo lizamaela mwa mukoloko! Mi Moya o Kenile ha u patulula Liseli, kuzwa kwa kuluka kutaha kwa kukeniswa, kutaha kwa kolobezo ya Moya o Kenile, mi cwale hola ya mafelelezo ya Kutaha kwa Kreste; ifitile fa mayemo a siswaniso, isiñi ku mulena wa musali, kono ka Mulena wa Lihalimu u icemela Iliyena, sina keleke ha se ibile bukaufi kukena mwa bunyinyani, sina bulumiwa mo bu lukela kubela bulumiwa bwa mufuta wa Na nani.

<sup>100</sup> Bani bene ba shwezi mwa lusika lwa Luther, kwatasi a piramidi, cwalo; isiñi tuto ya piramidi, kono ki ka mutala fela.

<sup>101</sup> Piramidi yani i petahalile hahulu, haiba ufi wa mina kaufela ubile teñi. Hamukoni nihaiba kufitisa kabemba, mane. Neba—neba sina sileze ku yona, kuya ka mo lu zibela. Muyahelo wateni

neli o ipitezi luli! Cwale, ne ba latehisize licwe la kwa toho. Ha ba zibi kuli li kai. Cwale mi licwe la kwa toho lani ha likuta, ikaba fela sina amañwi a ona, li ka tamahana ni licwe le li kwaluhile. Haiba mu lukela kubeya licwe la kwa toho ku lona, lina ni kuba ona cwalo.

<sup>102</sup> Mi cwale Jesu ha ka kuta, Uka fumana Keleke ye tapile, yesina litiba kamba nyazo, mi ikaba bulumiwa bo buswana bo Na nani. Bu ka tisa Licwe la kwa Toho.

<sup>103</sup> Sina lizoho laka fa, mwa muluti. Ki muluti, fela ku unsufezi sina lizoho laka haliba le linsu hahulu... Ki muluti fela *fa*, o munde *fa*. Sina sa nzohoto ni silyo, si ya siba ka bukiti luli; lififi bwii, lififi bwii, lififi bwii, mi mafelelezo za to swalana hamoho, mi sina nzohoto ni silyo halitaha hamoho.

<sup>104</sup> Fani kona fo Keleke ni Kreste haba tamahana hamoho, sina Munyaliwa, ka Moya o swana onoli ku Yena ukaba ku Yena; foo Keleke yani ha izwa kwa kuluka, kukeniswa, kolobezo ya Moya o Kenile, kukena mwa mazazi a maungulo, ni ku i wisezafafasi cwale kwa Kutaha kwa Mulena.

<sup>105</sup> Oh, musike mwaba siemba se si buhali ku Lona, muzwale wa Pentekota. Mu benye ka Linzwi ni kulumela siemba sa Lona kaufela. Musike mwa kena mwa milao ye ni lika zeñwi, sina mo lu bonela ha li ezahala kacenu. Musike mwa komokiswa ki zeo, kakuli Licwe la kwa toho la taha, inge li lila, “Abba, Ndate,” cwanoñu nyana fa, “Mulimu wa Ka! Mulimu wa Ka!” Eeni, Na lumela cwalo ka pilu yaka kaufela.

<sup>106</sup> Kana mwa bona nji? Mwa ziba se Ni talusa? Ki Kreste cwale unga masila a maabani, wa Lutheran, Methodist, Presbyterian, ni babañwi cwalo, mi Usweli ku ba beya mwa muzamao. Ki mufuta mañi wa muzamao? Musebezi wa Moya o Kenile; sene ba nani, ni kufita; ku lieza kufitela A beya mwatensi sibupeho sa Hae Tota, foo Keleke ni Kreste ha ba ba alimuñwi mwa tamahano. Mulimu, lumeleza cwalo! Ni sepa kuli mwa si bona. Haiba mwa si bona...

<sup>107</sup> Si ni hupulisa likande, kuli fani—fani ancafazo yetuna ya Welsh hane ikalisize. Muuna yomuñwi yomutuna mo mwa naha na hupula kuli ne ba ka ya ku yo bona ancafazo ya Welsh, sene si ka ezahala. Mi hane baya cwalo, ku yo batisisa, ku yo bona tuyaho mo ne i ezahalela. Ha ba yo fita kwa Wales, ba ya kafa ni kafa, ba kala kubuza kone kuna ni tuyaho wani. Ba bona mupolisa wa mwanana ya tabile inge ayemi fa manganandila, ni kuwani ya hae kwatoho, mi nasweli kupotolosa mulamu wa hae mwa lizoho cwalo. Mi kacwalo baana bani ba taha ku yena, mi bali, “Muñaka, kana wakona ku ni bulelela tuyaho mo ku ezahalela ncaafazo ya Welsh?”

<sup>108</sup> Ki hali, “Eeni, sha, Ki na! Ki na!” Kiñi? Na sweli ku sulula tabo ni Liseli la Welsh—Welsh mwahala hae.

<sup>109</sup> Kona mo i lukela kubela ni keleke ya Pentekota kacenu, ya buza, "Jesu Kreste ki mañi, ya swana maabani, kacenu, ni kuyakuile?" Liseli la Hae la Evangelii ya Hae li lukela kumonyeha ka Linzwi la lusika lo, kupatulula Jesu Kreste kwa na, inge fela mo ne kuinezi linako zani.

<sup>110</sup> Na tezi hahulu ancafazo ya ma Welsh kufitela yena aba yona ncafazo ya ma Welsh.

<sup>111</sup> Lu lukela kutazwa hahulu ki Kreste kufitela lu—lu Mu bonahalisa mwa mata a Linzwi la Hae se si tomezwi ku luna mwa lizazi le. Mizwale, musike mwa obamela mwa lika za lifasi, musike, lipilaelo ze li si ke za mi keluseza kwahule. Mupile ni Evangelii. Mutokomele Linzwi kaufela! Musike mwa kutela ku sa bulezzi ndate yomuñwi. Ha luyenii ona fa cwale ku sa na bulezzi Jesu kuli si ka ezahala mwa lizazi le. Eeni, sha. Lu lukela kuba Liseli la lusika lo, ku bonahaza Evangelii. Luther nali liseli la hae. Wesley nali liseli la hae, Pentekota neli liseli la hae. Kono, lu kwahule hahulu mwa musipili cwale, lu taha ku Munyaliwa, lu biziwe, lu Baketwa. Muhupule, haiba mu cwalo, mu swana fela inge mupolisa yani, nana ni Sona ku yena.

<sup>112</sup> Muhupule, lo ki lusika lwa keleke ya busebene, Lusika lwa Keleke ya Laodesia. Kuya ka Sinulo 3, ba hana Kreste. Mwa lusika lwa keleke ifi kaufela yene bulezwi mwa Bibele, Lusika lwa Laodesia neli lo lu maswe hahulu mwahala ona kaufela. Ne lu Mu hanile, ku Mu hana, ku Mu kasheza kwande.

<sup>113</sup> Kana muboni kweli ha i unsufala, busihu bobuñwi, popu asika ya kale kwa Rome, kuzwa kwa Rome kuya kwa Jerusalema? Jerusalema, keleke ya kale hahulu; kweli ki mufuta wa keleke, kamita li monyehanga liseli la lizazi, hakusina lizazi, mi la unsufala. Ne ni swanisize sani fa limati lelinsu fa, lilimo zetalu kamba zene kwa mulaho, ni kubonisa likeleke, mwa mianda anda ni likitikiti za malapa mwahala na. Neli sikamañi sani? Neli muluti. Nako yapili popu ha na ka funduka, kutaha kwanu, kutaha mwa—mwa libizo la Paulusi, ni zeñwi cwalo, aya mwahala libaka zani; nana ni ku fuyola nuka, ku yo sila, ni zeñwi cwalo. Kana nu—nu nuka neitokwa mbuyoti nji?

<sup>114</sup> Ki butata mañi bobuli ni lusika lwa keleke lo lupila ku lona kacenu? Kikuli ha muboni nji? Mulimu na li bulezzi mwa mbyumbiyulu, ku li bulela fela mwa Linzwi la Hae, ku li bulela fa pampili, ku Li patulula mwahala sicaba? Kikuli hamukoni ku kwalula meto a mina ni kubona hola? Ba ki bona baba paka Niti. Le kona Liseli la hola.

<sup>115</sup> Mutualime muzamaao omutuna wa swaliso, usweli kukena mwa katengo ka kwani cwale, ku panga fela siswaniso sa sibatana, mwa Sinulo 17, ona cwalo fela mo ne i bulezezi kuli kona mo ne ika ezeza. Mina sicaba sa Mapentekota mu ka ina inge mukuzize ka zeo ni kukena ku zona? Kakuli nako yeo itile.

<sup>116</sup> Cwale seli nako ya kuzuha ni ku tukisa lambi ya mina, ni ku monyeha ka Evangelii ya Jesu Kreste ni Mata.

<sup>117</sup> Ni ziba kuli ye ha ki nto ye zibahala, buñata bwa balikani baka ba Pentekota ha ne ba ina ni pope ni lika zeñwi, ni kubulela kuli, “Ki maikuto luli a moyo.” Ku na, ki—ki mafosisa. Ki kulwanisa Bibele. Mutuhele Linzwi la Mulimu libe la Niti. Eeni, sha. Seli nako cwale. Lu bona mizamao yemituna ye izamaya mwa... Oh, ibonahala bunde kwa liito la nama, luli.

<sup>118</sup> Keyafasi na bonahala hande ku sa na patulula kwa baprisita, mwa lizazi lani, zazi lani kaufela. Kono Jesu nali yena Liseli lene li eza Linzwi kuba lelipila, kono tutengo twa bona ni zeñwi cwalo ne ba foufalize meto a bona ku Lona. Na ize, “Mu ba tuhele ona cwalo; sibofu si etelela sibofu sesiñwi, ba ka wela mwa musima kaufela bona.”

<sup>119</sup> Lu kutezi kwa nako yani hape, mizwale ni likezeli. Lu kutezi kwa hola yani hape. Mulemuhe. Kiñi? Ki taba yeswana.

<sup>120</sup> Lu fumana kuli ona—ona maseli amatuna o lupila ku ona, mwa mazazi afelile a felile, nali fela hande, haluna se lu ba nyaza ka sona. Kono, Lusika lwa Keleke ya Laodesia loo, mu tokomele, muhupule, ki ku haniwa ki Kreste. Mi ona cwalo kona mo kuinezi cwale.

<sup>121</sup> Katengo kakatuna ka zamaile ka kupotoloha, ku kopanya Baipanguli kaufela hamoho, ona muzamao wa swaliso wo. Mi si eza sikamañi? Si unsufulisa Linzwi luli, lona kasibili, mi Linzwi ki Kreste. Kana bakona kueza cwani? Kanti, Sayansi ya Sikreste, ni Mizwale ba United Brethren, mi buñata bwa sicaba sani mwa likopano zeñwi zetuna, babañwi ba lumela kupepwu kwa mwalyanjo, babañwi habana, babañwi ba lumela *se ni sani*. Kana ukona cwani ku ikopanya kwa ku sa lumela? “Bababeli bakona kuzamaya cwani hamoho ha ba sa lumelelani?” Amuzwe mwahala bona mi mu kauhane, ni kunga Linzwi le li Kenile la Mulimu ni kupila ka Lona.

<sup>122</sup> Jesu Kreste utamehile ku bonahalisa Linzwi la Hae. Taba ye lutokwa kacenu ki kuzuha kwa Malaki 4. Mupolofita yomuñwi uka taha ka Libizo la Mulena Jesu Kreste, mi uka tisa ona cwalo sa Na sepisize kueza. Mi, mutu ka bubofu uka Li hana ni kukena mwa lififi, sina mo ba ezelize kamita.

<sup>123</sup> Mutualime cwale, lu fumana kuli, ki taba yeswana, kuli kacenu, kuli ba hana, likeleke li hana Liñusa, ku kokotela Linzwi, kuzusa Linzwi kwateni. Cwale haiba ha mu fumanehi ku yona, mane hamukoni nihaiba—hamukoni nihaiba kuba ni keleke ya mina. Ba ka i kwala. Mu lukela kutaha ku zona. Haiba ha muezi cwalo, mu kwalilwe. Cwale kucwani he ka zeo? Oh, mu yemele Se si lukile! Muhupule, ki nako ya kutakiswa hape, cwalo.

<sup>124</sup> Liseli la buhata kona lene li tisize bu—bu busholi tuna bo lifasi likile la ba ni bona, mwa England, ha ki kale hahulu.

Bulengwami bo butuna bo bu kile bwa ezwa fateni, ne bu ezipwe ka liseli la buhata. Madollar a likana sebene milioni ana uzwizwe neli ka liseli la buhata le ne li zamaisize sitima sani ka bunya, mi ba Scotland Yard neba si kafumana muuna yani. Ba ya ni yena, ka buhali luli. Sani ne si zibilwe ka busholi bo butuna bo bu kile bwa ezwa ka busholi, mwa nama. Ne li ku uzweza lifasi, ka kuuzwa kwabona ko kutuna.

<sup>125</sup> Mi bulengwami bo butuna bo bu kile bwa ezwa kwa keleke ya Jesu Kreste, bu ezipwe ka liseli la buhata, mbengenge ya mbundu ya lusika loluñwi, ni kuhana Liseli le li sepisizwe mwa lusika lo. Amen. Liseli la buhata, mbengenge ya mbundu ya maabani! Musike mwa zamaya mwa mbengenge ya mbundu ya maabani. A mu zamaye mwa mufutumala wa Mwana kacenu. Musike mwa ikahela mwa muluti wa kopano, ni kubulela kuli, “Mazazi a limakazo a felile.”

<sup>126</sup> Jesu naize, “Lisupo ze li ka latelela baba lumela: ka Libizo la Ka ba ka leleka mioya ye maswe, ba ka bulela ka malimi asili. Lisupo ze li ka ba latelela.”

<sup>127</sup> Ba li, “Ku lukile kwa ba apositola; isiñi ku luna.” Yani ki mbengenge.

<sup>128</sup> Jesu naize, “Lisupo ze li ka latelela baba lumela, kwa lifasi kaufela.” Eeni, sha.

<sup>129</sup> Cwale ki butata mañi? Kuzamaya mwa mbengenge, kwa tisa ku uza ko kutuna, ni kuzwisa Kreste mwa keleke. Mwabona, kana Kreste ukona cwani ku iponahaza Iliyena mwa Linzwi leli sepisizwe kacenu, ka lituto zeñwi ze bata za maabani? Ha i futumazi Peu. Batili, sha. Busholi bobutunwa bwa kwa keleke!

<sup>130</sup> Ku futumala? Mi, muhupule, ona liseli la tuto ya tumelo lani halina ku buzwisa Peu ya kacenu. Ya latula Peu. Ki mbundu yeli mwa lifasi, ki nyandiso. Seli nako yakuli Mulimu azuhe ni kutukisa Liseli hape, aeze Linzwi la Hae kupila. Kaniti, Liseli! Ona tuto ya tumelo ye bata yani haina ku buzwisa Bubeke kwateni. Kaniti halina kubeleka.

Mi, muhupule, zwelopili izamaile ni lizazi.

<sup>131</sup> Sina ha Ni mi bulelezi kwa simuluhu, Ni lukela kutokomela linguli, mo li zamaela ze bupilwe. Hanina tuto ya kueza cwalo; Ha ni li tabeli. Ni tabela kuba ni se Ni nani, kufita tuto kaufela mwa lifasi. Ni na ni Jesu Kreste. Ni Mu bona ha pila Linzwi la Hae hande, mi kona fela ze Ni tokwa kuziba.

<sup>132</sup> Mi haiba mutu upepilwe ka Moya wa Mulimu, uka tatuba Mañolo kuli abone haiba Ki kalabo ya kacenu. Kalabo ya lizazi le ki Kreste. Kreste ki Linzwi. Mi Linzwi ha litaha kwa bupilo, li bonisa Liseli le li sepiselizwe kacenu. Mwa Lusika lwa Laodesia lo, ki alikani fela, “Bona bo Ni amuhela, Na shapa, Na kalimela. Mubake,” Jesu naize, “mi mukute kwa mulaho.” Mufetuhele kwa Linzwi. Ki yena Linzwi. Mutahe ku Yena. Eeni, sha.

<sup>133</sup> Mutualime Liseli. Ne li zwelezi kwa Upa, kuya kwa wiko. Lu kwa Likamba la Wiko. Ne ina ni likalulo zetalu, nji cwani? Neina ni likalulo zetalu. Ne i sila mezi, linako zetalu. Kuzwa ku Paulusi, ni kufita mwa Mediterranean, kutaha mwa Germany, Germany ye yemi ni Luther; kusila Nzila ya Sikuwa, kukena mwa United States mi cwale... kuyo punya kwa—kwa England; mi, England, Ya taha mwa libaka za Pacific, kwa United States. Mi nasweli kubeleka katata kuya ka liñusa la Luther, kutaha cwalo, kufitela siemba sa mafelelezo sa Lona si kwanu kwa Likamba la Wiko hape.

<sup>134</sup> Mi kuzwa kwa kubuzwa kwa peu, kuzwa musipili kaufela kukuta kuzwa ku Luther, kutaha cwalo mwahala lusika, i lukela kuba mutalelala wa Evangeli cwale, Mata a Mulimu kuli a buzwe. Liseli le li bonisizwe ka kuluka, ku keniswa, lusika lwa pentekota, i lukela ku buzwisa Kota ya Munyaliwa kwa Kutaha kwa Mulena Jesu Kreste; kuli Kreste a bonahale mwa Keleke ya Hae, kakuba Mutu alimuñwi, Yena ni Musala Hae, Yena ni Munyaliwa wa Hae. Amen. Ye kona hola ye lupila ku yona. Le kona Liseli la lizazi le. Mu zamaye ku Lona! “Mu piliswe, mafelelezo a lifasi kaufela.”

<sup>135</sup> Mbengenge ya mbundu ya keleke ya lizazi le nei puma luli, Jesu naize mwa Mateu 24. Na ize, “Li ka puma ni bona ba baketilwe haiba ku konahala.” Mwabona, isiñi Luther na si ka amuhela... Luther na si ke a puma wa Methodist. Wa Methodist hakoni kupuma wa Pentekota. Yeo ki niti, mwabona, kono kucwani he ka Munyaliwa? Sani kona se si tiba meto a Mapentekota. Eehe. Mwabona, mu kutezi kwa lituto za litumelo za mina, kwa mufuta wa mina, mu ongaongilwe, mi muna ni sikwata sa batu se si mi bulelala mwa kuezeza.

<sup>136</sup> Bibele ya sepisa lika ze. Lu tokwa baana ni basali baba talizwe ka Moya wa Mulimu.

<sup>137</sup> Haiba u bulela kuli una ni Moya wa Mulimu ku wena, mi Mulimu ufa sepiso yeñwi mwahali Mo, kana Moya o Kenile wani ukona ku Li bulela cwani, kuli, “Kihande, zakona kuba hande kwa lusika loluñwi. Ha lu Li lumeli ka nzila yeo”? Wani ha ki Moya o Kenile.

<sup>138</sup> Mutu ya tezi Mulimu, yena ni Linzwi ki alimuñwi. Kaniti, ku cwalo. Ki siemba sa kutwano, tamahano mwahala Mulimu ni mutu.

<sup>139</sup> Kana musali ukona cwani, ya kaba muuna ya nyezi, ya shutana, ueza lika za sa lati kuli aeze? Lukona ku bapala cwani ni lifasi, ni likopano ni tutengo, ni kuhana Liseli la hola? Likona kuezahala cwani, muzwale ni kezel? Ka lilato la bumulimu ni likute ku mañi ni mañi wa mina, lukona kuamuhela cwani lika zee? Lukona ku li utwa cwani? Li kasheza hape fa mautu a luna hape.

<sup>140</sup> Musike mwa nyaza ma Lutheran; kakuli, ne ba nyazize ba Katolika. Musike mwa nyaza Wesley; kakuli, na nyazize ba Lutheran. Mwabona, sina cwalo, ha u nyaza Sika se si ezahala kacenu ni ku Si kekuluhu; ha mu bona likeleke za mina likena mwa muzamao tuna wa swalisano woo, ni zeñwi cwalo, ze mi zamaisa, yeñwi ni yeñwi, kukena mwa nombolo ya sibatana, mi muna ni zona. Buñata bwa sicaba se si sepahala si zamaya hande kukena kuzona.

Mu li, “Ki batu babande, sicaba se si kenile.”

<sup>141</sup> Kona mo ne ba inezi ni baprisita bani. Haiba Ni kona kuamuhela kukena kwa Jesu Kreste, kamba miselo ya Moya, buñata bwa mina mu ile ku se . . . Cwale, ha ni shwauli. Ni lumela Linzwi la teni kaufela.

<sup>142</sup> Babañata ba ka li, “Oh, Ni bulezzi ka malimi. Nina ni Ona.” Zeo ha ki Ona. Batili, sha.

Buñata bwa bona bali, “Muselo wa Moya, ki Ona.” Kana ki Ona?

<sup>143</sup> Ha lu beyeni Jesu mwa muzeko (Mulimu, ni swalele) fa nako nyana. Ha lu mi tiseñi, mi Ni kaba muprisita. Ni ka li ku mina, “Mutangana yo, taha mwa muleneñi, ya bizwa Jesu wa Nazareta. Usike wa Mu teezeza. Lu lumela muselo wa Moya. Cwale mutualime fa, muprisita wa mina yomunde wa kale. Yena, kuku wa hae wa muuna, kuku wabo kuku wa hae yomutuna, neli baprisita kaufela. Na talekilwe, mwa bupilo bwa hae kaufela. Na inzi fela mwa sikolo sa bukutazi. A talima, a lumela, a—a eza lika kaufela ze ne ba mu lutive. Wa ziba Liñolo, kuzwa kwa A kuisa Z. Mane u Li ñolanga, yena kasibili. Ku ñola Mañolo, yena kasibili, bañoli ba ezanga cwalo. Mi ki yo fa, muuna yomutuna! Mwa ziba ki yena.

<sup>144</sup> “Ki sikamañi sene si ezahalile bo maho hane ba ku pepile? Ki mañi yana yemi kwa tuko ni mumbeta wa hao? Yena muprisita wa kale yani. Fani boma ni bo ndatahe hane ba ka kauhana, baba beya mazoho kubona ni kubaisa hape ku Mulimu? Muprisita yani wa kale. Ehe.

<sup>145</sup> “Mi fa Jehova ubata ngunyana ya sitabelo, sa sibi. Baana ba pisinisi, ba pila mwa litolopo ze mi ba—ba lekisa libyana za bona, ni—ni zeñwi cwalo, libyana za bona ni kupepa, ni se ba ka lekisa. Ha ba uti lingu. Mi ki sikamañi sene ba ezize baprisita? Na yemisize nyana fani, kuli ba lekise lingu, kuli muuna yo akone kukena mwatensi, ku patalaza moyo wa hae ni Jehova.

<sup>146</sup> “Ki sikamañi sa ezize mutangana yo, Jesu wa Nazareta, sa eza? Ki keleke mañi kwa Na zwelela? Ki kopano ifi Ya fumaneha ku yona? Ki kadi ya kopano ifi? Lu ka Mu lahela kwande. Haluna kuba ni sa kueza ni Yena, kakuli U nyaza mañi ni mañi wa luna. Ki sikamañi sa Na ezize? U ya kwani ni kunga sani, koo batu balika ku pilisa mioyo ya bona, keleke,” sina mo lu kona ku ibizeza kacenu, mina sicaba sa ngana ya moyo, “U lahakile fa

tafule, a tisa cinceho; anga anga mihala ni kuiota hamoho, ni ku ba lelekela fande; ni kubiza muprisita wa kale yani wa bumulimu wa hao, ‘mwana wa diabulosi,’ muuna yomunde wa mufuta wani ya na kufile masheleñi ha no li mwa butata.

<sup>147</sup> “Ki mañi ya ka yema bukaufi ni wena ni ku ku pumbeka ha u shwile? Ki muprisita wa kale yomunde yani. Una ni muselo wa Moya. Kono kana Jesu wa Nazareta yo una ni muselo wa Moya?”

<sup>148</sup> Hamukoni ku atula ka kubulela ka malimi, kamba nihaiba ku atula ka muselo wa Moya. Kono ki ponahazo ya Linzwi la Mulimu, ye tiswa kwa Liseli. Ki Liseli le li eza lika.

Muuna ya zamaya mwa Liseli lani! Jesu Kreste na si ka fumanwa kuli abulele ka malimi, ni ha Na ezize cwalo. Na si muselo wa Moya, ni ha Na ezize cwalo. Hamukoni ku u atula. Kono Na lumela ni ku Li bulela, mi Mulimu apila Linzwi kaufela la sepiso ya lizazi lani ka Yena. Lani kona Liseli la hola. Yani kona bupaki.

<sup>149</sup> Mi mutu ha ni bulelela kuli Moya o Kenile usuluha ku yena uka latula Linzwi la Mulimu kuba cwalo, kuna ni se si fosahalile ku ona. Kuna ni se si fosahalile mwa mikopano ya luna, ni zeñwi cwalo, ha ba luta mutu litaba ze kaufela za bulapeli bwa mwa booko ni lika zeñwi za kacenu. Muuna yani na ka eza ze swana kulwanisa Linzwi la Mulimu, ni ku ba isa mwa pulao ya swalisan kulo kwani, kiñi, kicona, ku fosahalile.

<sup>150</sup> Ni bulela cwalo ka Libizo la Mulena! Mutualime mi mubone haiba ha Ki niti, ki Liseli, ki Liseli la hola!

<sup>151</sup> Lituto za litumelo ze bata zeo halikoni kutisa kutulo. Lu lukela kuba ni Keleke ye tapile mwa Mali a Ngunyana, ni kuba alimuñwi ni Linzwi, kuba Keleke.

<sup>152</sup> Mbengenge ya mbundu ya keleke ya lizazi le, Jesu naize, mane i puma luli, “bukaufi ni Baketwa kambe ki nto ye konahala.” Ki Baketwa fela! “Kono sina mo ne kuinezi mwa mazazi a Nuwe, fani miyo ye ketalizoho ka yemilalu ha i to piliswa, kona mo ku kabela ni fa Kutaha kwa Mwana mutu.” Luli, ki babanyinyani fela baba ka piliswa ka nako yani.

<sup>153</sup> Si eza sikamañi? Si etelela kuya kwa libulaelo. Lu fumana kuli mwa lififi la kacenu le lupila ku lona. Na kwala, ka kubulela cwana. Mwa lififi la cwale le lupila ku lona le, mazazi e lupila ku ona aa, mi Liseli ha se li timile mwa lihalimu, Li tukezi mwahala luna mo, fapila luna, ku to lu monyehela; kubonisa ka Bibele, fa Maswayo Asupa, sene si ezahala. Mi fa Mulimu uli paka hande mwa lihalimu, litahafafasi ku to li bonahalisa mwa lifasi. Mi likeleke za zamaya kukena ku zona!

<sup>154</sup> Ki mañi ya ka pilisa Munyalawa ya buluka Linzwi yani cwale? Ki sikamañi se si ka ezahala ku Yena Ha ka fetuha kuba ya bata, ka Yena luli? Haana kubatelwa, ki Linzwi le li pakilwe la sepiso ya lizazi le. Oh, eeni. Kuswana sina . . .

<sup>155</sup> Kwa lyanganisa, Na ziba kwa konahala, kwa sicaba, kubona keleke ha ibulela fela kuli, “Kihande, ki nto yeswana fela.” Jesu naize kukaba ona cwalo. Ku kaba cwalo, kufitela, “Li ka puma ni bona ba Baketilwe kambe ki nto ye konahala.” Oh, eeni. Eeni, sha.

<sup>156</sup> Si ni hupulisa fela mulikani mwa Florida, ha ki kale hahulu. Na sweli kubulela, kuli nana ni mota ya kwa Chevrolet yene mu tahela kwa Florida, mi abulela kuli a i isa kwa sibaka sa ku lukiseza limota. Mi mulukisi yo na sweli kuzamaya cwalo, mi aba ni lika kaufela ze beilwe hamoho, mi apalelwa ku i liza. Na beile lika kaufela mwateni, za na kona kueza. Na ncafalize lika zeshutana ze kaufela, kono, nto yeñwi cwalo, ne li si ke la beleka fela. Mi na palelwa ku i liza. Na tundamezi fela kulika ni kulika. Mulukisi yomunyinyani yani na ikalezwi, kumata mata, mwa muyaho kaufela, wa nopa se.

<sup>157</sup> Mi muuna ya yemi, ali, “Ni libelezi mota yaka, sha. Ni liyehile. Kikuli ha u twi nji?”

<sup>158</sup> Ki hali, “Ni eza kaufela ze Ni kona kueza,” na ikalelwa na i tiisa ka mo nizibela kaufela. Mi ki ha zamaya cwalo.

<sup>159</sup> Handende muuna ya tinile hande ataha ku to mu talima fa nako nyana, mi ki hali ku mulukisi, amano nata fela toho ya hae kwa limota fa nako nyana, ki hali, “Kiñi fela ha u sa swalí se? Hakuna mulilo ofita mwateni.”

<sup>160</sup> Kacwalo ki hali, “Ha ni si ka nahana cwalo.” Kacwalo afetula fela nto yeñwi yenyinyani yani, kamba neli sikamañi kaufela, mi ki ha nga li—li malaiti mwahali, mota ya tuka.

<sup>161</sup> Afetuba ni kubulela kuli, “Ki wena mañi?” Mwa ziba yo nali yena? Mulukisi yomutuna wa—wa ba General Moters. Na ezize taba yateni. Ki yena ya na i pangile.

<sup>162</sup> Mwa hola ye, muzwale, ha lu zibi kuli ki butata mañi bo buli ni ancafazo ya luna, ki butata mañi? Luna ni libyana ni lika kaufela, luna ni libelekiso, kono Mata ainzi kai? Sani kona se lutokwa, ku shimbulula Jesu Kreste mwa sibaka. Ki butata mañi? Na mi bulelela, kuna ni Alimuñwi mo kacenu, haleluya, ya bizwa Moya o Kenile, ya kona kuswala Mata. Ki yena Mata a libelekiso.

<sup>163</sup> Lu yemi kacenu, luna Mapentekota, iliñwi ya likeleke zetuna hahulu mwa nahe, likitikitii ni likitikitii ze ekelizwe mwaha ni mwaha, kono ukai Moya o Kenile wani? Lu li amuhezi, ka kubulela ka malimi, mi luboni mo li ezeza. Methodist ya li amuhela, ka kuhuwa. Luther na li amuhezi, ka tumelo, ni zeñwi cwalo. Zeo ha ki Zona.

<sup>164</sup> Ki Linzwi! Ki Linzwi le li hanilwe, Liseli li monyehezi fa libelekiso mi li ba ni Mata. Ki Mata, mi Mata, mi Mata a taha fa libelekiso. A kala ku potolosa lika. Yeo ki niti. Munge Linzwi. Haiba kuna ni nto iliñwi ye siyezi, ku Lona, halina ku kutuka.

Amubeye kwatuko buima kaufela, swalisano kaufela, tuto ya tumelo kaufela, kuli Mata, ona Moya o Kenile, wakona kufita mwa Linzwi ni kupaka Linzwi le li sepisizwe mwa lizazi le; mi kipeto Keleke yetuna ya Mulimu i ka zuha kuyema ka mahutu sina fulai ya jeti ye potoloha, kupahama mwa mbyumbiyulu ku yo kopana ni Muluti. Yeo luli ki niti. Kufitela lueza cwalo, halina kubeleka. Zeo kona ze ezahala. Eeni, sha. Ki mañi ya ka eza cwalo? Ki mañi ya ka li buluka mwa lizazi le lu nahana ka lona? Muhupule, muhupule, muzwale.

<sup>165</sup> Cwale si ni hupulisa likande leliñwi. Isiñi kukutela kwa makande, kono mulikana ka na yemi mwa Carlsbad, New Mexico, hane luli kwani inge lu na ni mukopano kwa Carlsbad. Mi nekuna ni sikhata sa batu bene bailo kena mwa liñope le.

<sup>166</sup> Oh, Na—Na li kuba ni eze ze cwalo, kulo kwani ko ku tungile, mi mwendi ki maili fela mwa mubu. Na, Na ikutwa hande kulo fa. Kacwalo, ba ya cwalo. Ni bata kuya fahalimu, isiñi mwatasini nyana. Kacwalo Na . . .

<sup>167</sup> Se ba nga mutu yoo, ya kena kulo mwani. Mi nali mulikani wa muuna, ni musizana wa hae yomunyinyani ni mushimani yomunyinyani ba zamaya ni bona. Mi—mi ya ya mwatasini a malibela amatuna, oh, Na sepa, mianda ni mianda ni mianda ya liñokolwa zeñata mwatasasa mubu, ashetumuka kwani. Mi muuna yani ya na inezi bukaifi ni fa kutukiseza, ona fani fela [Muzwale Branham uliza munwana wa hae hañwi—Mu.] a tima fa kutukiseza. Mi ne ku na ni lififi lelituna ni ku unsufala luli, kufitela mane upalelwa kubona lizoho la hae ha li zamaya kwapili a sifateho sa hao. Musizana yomunyinyani, nto yenyinyani, na sabile luli. Akala kuhuwa katata fa halimwa linzwi la hae, “Oh, ku unsufezi! Ku unsufezi! Ku unsufezi,” kuhuwa ka lilata.

<sup>168</sup> Munyana hae wa mushimani na yemi. A huwa mwa lififi, mi ali, “Usike wa saba, kezeli yomunyinyani, kuna ni muuna fa yakona ku monyeha liseli.”

<sup>169</sup> Haleluya! Keleke yenyinyani ika eza sikamañi? Musike mwa bilaela. Kuna ni Muuna fa kacenu yakona ku monyeha Liseli, yani ki Mulena Jesu Kreste. Oh, eehe. Mulena Jesu Kreste!

<sup>170</sup> Muhupule, libofu . . . ba—ba baana baba fumile mwa mazazi a kupepwa kwa Jesu, ne ba si ka lelekelwa kwande ni ku foufazwa kwa mbengenge ya mbundu ya Jerusalema hane ba ilo fita kwani, inge ba Mu buza. Lituto za bona za bulapeli—za bulapeli ne li si ka li toloka. Kono ha ba sikuluhela kusili, ba Li latelela mwa Liseli la Bupilo Bobusafeli.

<sup>171</sup> Mina baana ba pisinisi kacenu, musike mwa talima mbengenge ya mbundu ya likopano ze, kono mu kumalele kwa Linzwi. I mi isa kwa Liseli. Usike wa saba, kezeli yomunyinyani, kuna ni Muuna fa Yakona ku monyeha Maseli. Kuna ni Kreste fa Ya kona kueza Linzwi la Hae kuba le lipila ka kuswana fela sina

mwa Na inezi nako yani, inza iponahaza Iliyena kuli Wa swana maabani, kacenu, ni kuyakuile. Kana mwa lumela cwalo nji?

Halu yemeñi.

<sup>172</sup> Nina ni mizuzu ye lishumi ka ye ketalizoho nako isika ya kale kwa mukopano otatama. Kikuli mutabela kunanula mazoho a mina ni kubulela kuli, "Mulimu, aku ni fe liseli, kakusasana cwana. Na lumela Linzwi. Na lumela mwa lisipi. Beya Mata ku na, Mulena"? Mu nanule mazoho a mina ni kuhuwa ku Yena kuli, "Mulena,amu tukise Maseli!" Kuna ni Muuna fa yakona ku monyeaha Maseli. Lu shwile, mwa swalisano, ni kuca ni mifuta kaufela ya tutengo twa likopano, kono kuna ni Muuna fa Yakona ku monyeaha Maseli. Muuna yani ki Moya o Kenile, Kasibili, Jesu Kreste ya bonahalile mwa Moya!

<sup>173</sup> Mulena Jesu, swala mañi ni mañi wa mazoho aa; isiñi fela mazoho, kono ki kumatela kwa lizoho kwa pilu, ni kutukisa Liseli la Evangel. Ka Libizo la Jesu!



*TUKISA LISELI* LOZ64-0125  
(Turn On The Light)

Liñusa le ka Muzwale William Marrion Branham, neli kutilizwe lwa pili mwa Sikuwa la Pelekelo kakusasana, Sope 25, 1964, mwa mukushuko wa ba Full Gospel Business Men's Fellowship International ili fa Ramada Inn mwa Phoenix, Arizona, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)